

四庫全書

集部

欽定四庫全書

集部

元文類卷四十二

詳校官通政使<sub>臣</sub>夢吉

助教<sub>臣</sub>常循覆勘

總校官庶吉士<sub>臣</sub>朱鈐

校對官中書<sub>臣</sub>嵇承志

謄錄監生<sub>臣</sub>劉天耀

欽定四庫全書

元文類卷四十二

元 蘇天爵 編

雜著

憲典總序

皇朝憲典之作其篇二十有二焉而各以其序也法緣  
名興令自近始故名例為法之本衛禁居令之先百官  
有司守法以奉上布令以御下故職制次之敬莫大於事  
神畏莫大於知義故祭令學規次之刑以弼教威以戢

暴故軍律次之禍亂式遏生聚易爭故戶婚食貨次之  
爭起於無厭無厭者好犯上故大惡次之惡之初稔非  
淫即貪故姦非盜賊次之淫貪之作始於自欺故詐偽  
次之偽作於心徵於詞氣故訴訟次之辭窮則鬪氣暴  
則殘故鬪毆殺傷次之庶獄備矣庶慎興焉示為法者  
非罔民也故禁令雖犯次之知禁者罪可遠觸禁者罪  
不可逃故捕亡次之君子立法之制嚴用法之情恕無  
求民於死寧求民於生故恤刑平反赦宥又次之至於

終之以獄空則辟以止辟之效成刑期無刑之德至矣  
此其為序如是槩而論其為書則固五典之法書也治  
典非憲無以明黜陟賦典非憲無以慎出納禮典非憲  
無以儆傲惰兵典非憲無以律驕盈工典非憲無以懲  
濫惡其事散殊其法周密故必隨事以分類隨類以表  
年綱以著其約目以致其詳初若因目以立綱久乃從  
綱而知目綱舉目張吏易遵行民易趨避而是書之體  
用庶乎其為得矣綱之所不能該目之所不能悉則有

附錄焉作憲典總序

名例篇

名例者古律舊文也五刑五服十惡八議咸在焉政有沿革法有變更是數者之目弗可改也傳曰不愆不忘率由舊章作名例篇第一

五刑

國初立法以來有笞杖徒流死之制即後世之五刑也凡七下至五十七用笞凡六十七至一

百七用杖徒之法徒一年杖六十七一年半杖  
七十七二年杖八十七二年半杖九十七三年  
杖一百七此以杖麗徒者也鹽徒盜賊既決而  
又錄之使居後也數用七者考之建元以前斷  
獄皆用成數今匿稅者笞五十犯私鹽茶者杖  
七十私宰牛馬者杖一百舊法猶有存者大德  
中刑部尚書王約數上言國朝用刑寬恕笞杖  
十減其三故笞一十減為七今之杖一百者宜

止九十七不當又加十也議者憚於變更其事  
遂寢流則南之遷者之北北之遷者之南大率  
如是至於死刑有斬無絞蓋嘗論之絞斬相去  
不至懸絕鈞為死也特有殊不殊之分耳然已  
從降殺一等論令斬首之降即為杖一百七籍  
流猶有幸不至死之理嗚呼仁哉

五服

昔者先王因親立教以道民厚由是服制興焉



法家者用之以定輕重其來尚矣然有以服論而從重者諸殺傷姦私是也有以服論而從輕者諸盜同屬財是也大要不越於禮與情而已服重則禮嚴故悖禮之至從重典服近則情親故原情之至從恕法知斯二者則知以服制刑之意矣國家初得天下服制未行大德八年飭中外官吏喪其親三年至治以來通制成書乃著五服於令嗟夫先王所以正倫理明等威辨

疏戚別嫌疑莫大於是也豈特為法家者設哉  
十惡

人之罪無大於十惡者矣王法之所必誅也故  
歷代之律著之首篇國家任子之法舉人之條  
皆曰不犯十惡者始得預列嗟夫之二者之選  
豈必其人有是惡而後絕之哉言不犯者意其  
必無也意其必無而猶慎之知人之難也

八議

八議者先王用法忠厚之至情也故自周官至於唐律具載之國家待國人異色目待世族異庶人具有大勲勞於王室者則固當有九死無與之賜十世猶宥之恩歟若夫官由制授者必聞奏而論罪罰從吏議者許功過之相贖豈非八議之遺意乎故仍古律舊文特著于篇以竢議法之君子

衛禁篇

人君一身天地民物之所寄宗廟社稷之所託故君門  
九重出警入蹕非自衛也所繫重焉國家肇基淳德馭  
下乘輿行幸歲以為常起居緝御扈從番直亦既周且  
慎矣今上皇帝入正大統內嚴管鑰外肅輦轂侍正置  
府通籍創符其為長治久安之策所以幸萬世者豈過  
計哉勅時幾弭姦慝作衛禁篇第二

職制篇

日月運四時行法度彰百官理至元班祿以來常任則

有省部諸院準人則有臺臣憲司立民長伯則總而方  
鎮分而郡縣以及府兵閭閻之世襲宮邸湯沐之樹建  
星列而綦布焉居積典守有官工肆視成有官河有防  
賦有漕驛有置冠蓋往來則有王人之銜命岳牧之移  
委受事既殊隨事為令其間禦暴而司平則捕盜典獄  
專庀厥司是故國中共守者曰總例則揭之化外羈縻  
者用輕典則傳之於是職制備矣嗚呼人君之遇臣下  
豈務恃法哉由夫才諂之不齊資踐之雜進然後罪列

公私臧論多寡而風紀之責望日益重矣定官箴謹侯  
度作職制篇第三

祭令篇

國有大事祀其一焉我朝稽古禋祀郊廟先齊擇日集  
執事官朝堂讀誓誡以徇朝服再拜聽受而退祭之日  
御史二人服其鴈冠以蒞之外而郡邑通祀部使者糾  
之如御史於是承事者罔敢不敬質神明壹臣志作祭  
令篇第四

學規篇

法至於學規輕之至者也而至重焉太祖皇帝始為國都學規世祖皇帝廣為國子學規今上皇帝親為王宮學規夫法不從吏議而出聖裁重之至矣乎本王化厲士節作學規篇第五

軍律篇

國家經武者定四方師律尚矣廟筭之折衝將略之制勝固非言之所可傳者惟夫仁義節制並行當時載之

簡書有可徵焉續成功奮武衛作軍律篇第六

戶婚篇

井田廢而廉讓之道缺爭殺之俗興民無恒居田無恒主婚姻不以其時而獄訟作矣教化不足然後制之以刑而非得已也法常典原人情作戶婚篇第七

食貨篇

治財之道厚民為本民者財之府財者民之命也故治財者先義而後利教民順先利而後義教民爭故治財



者先民而後國國常富先國而後民國常貧治財而有  
刑所以防姦欺制期程非治財之本也作食貨篇第八

### 大惡篇

天地之道至仁而已國以仁固家以仁和故國不仁則  
君臣疑家不仁則父子離父子離無所不至矣君臣疑  
亦無所不至矣故易著履霜之戒孟子有仁義之對審  
哉幾乎去仁惡足為國家哉作大惡篇第九

### 姦非篇

王化始於閨門故關雎之化行則天下無犯非禮桑間  
濮上之音作則男女相奔強暴相陵尊卑無別而上下  
失序矣文武道在施之則行古者聖人以禮防民制刑  
以輔其不及後世因之作姦非篇第十

盜賊篇

夫盜賊豈人情哉或迫於飢寒或驅於苛政或誅於誘  
脅出於不得已者十常八九至於白晝攫金於市略人  
以為貨皆有司不能其政所致使人人各得其所烏有

盜賊哉作盜賊篇第十一

詐偽篇

霸代王而淳朴散利勝義而詐偽生其來亦久矣夫孔子曰上好禮則民莫敢不敬上好義則民莫敢不服上好信則民莫敢不用情明王道辨義利崇廉恥固去詐去偽之本然刑者聖人有不能廢也作詐偽篇第十二

訴訟篇

易著訟卦書稱詰訟則雖五帝三王之世不能無訟人

有不平形之於訟情也然至於誣人以訟謂之情可乎  
孔子曰聽訟吾猶人也必也使無訟乎夫無訟聖人所  
難也然郡縣得一賢守宰苟能行之以道雖無訟可也  
作訴訟篇第十三

鬪毆篇

古者父母之讐不與共戴天兄弟之讐不反兵交游之  
讐不同國居父母兄弟朋友之讐止如是後世一言睚  
眦輒起而鬪鬪而至於傷至於殺其有司之政不舉風

俗之日偷且薄可見已甚而食祿共位比肩事主爭毫髮利即攘臂相向飛文相抵所以令於下者皆自上犯之欲以化民得乎懲將來監已往作鬪毆篇第十四

殺傷篇

禍而至於殺人極矣然情有謀故誤戲之異而罰亦有死杖流贖之殊研之窮之審之覆之古人所以深致慎焉者哀民死之易而生之難也敬之敬之毋淫於刑哉作殺傷篇第十五

禁令篇

戒之使避曰禁示之使從曰令一禁一令各專一事無所統該故上自朝廷下逮倡優走賤莫不備列使人知所避嚮而遠於罪作禁令篇第十六

雜犯篇

人之犯名義觸刑辟不可以一途盡不可以一類求因其已然制於未然作雜犯篇第十七

捕亡篇

凡囚之在獄而亡在流而亡軍士之臨陣而亡舉家而亡奴婢之背主而亡凡有罪而在亡者捕之各有律作捕亡篇第十八

恤刑篇

不教而民從之上也以身教之也教之而後從次也以言教之也不教而強之從下也既不能以身又不能以言而以威迫之也迫之而猶有弗從者焉乃從而刑之刑之而當罪民固無憾又從而虐之苦之誣之抑之飢

而不為之食寒而不為之衣疾而不為之藥有罪無罪  
同歸於非命而死不亦大可哀乎故書曰欽哉欽哉惟  
刑之恤哉作恤刑篇第十九

平反篇

天下之至窮其惟冤獄乎干天和傷王化莫此為甚故  
或三年而致旱或六月而飛霜此于定國雋不疑之徒  
日以平反為務而子孫世食其報也夫平反有司之職  
也宜不待賞勸而為之者而國家慎之重之著于賞令



作平反篇第二十

赦宥篇

赦宥者權事之宜可也列聖以來或以初政更新或以  
大禮行慶或以揀災卹生更或以懷遠招攜事既不同  
赦亦有異至於釋京畿繫囚則或以特赦或以佛事有  
司往往以罪輕而疑者應之然所釋有數故又有幸不  
幸存焉本忠厚示欽恤作赦宥篇第二十一

獄空篇

傳曰刑期于無刑又曰必也使無訟乎無訟斯無刑矣  
雖聖人為政不能不為之刑所貴刑措而不用耳是故  
獄空者化行俗美無訟而獄空者上也有司廉明隨事  
裁決而獄空者次也苟不得其上得其次斯亦可矣今  
所紀獄空內自京畿外止山東河北諸郡天下獄空未  
必止此有司載之弗能詳也嗚呼彼獄空者其無刑乎  
其無訟乎使天下皆得賢有司致此非難也作獄空篇

第二十二

## 附錄序

憲典之有附錄何議法者有沿革之不倫建言者有作輟之不一載之則非今日之循行削之則沒一代之典故於是事可入例者錄於前事難徧舉者附於後至於用罰之重輕上下之比附論人之淑慝有始終之異同善惡之彰瘴枉直之舉錯具存於是而公論自著焉此附錄之所由作也嗟夫治具百端性初一致齊其末唯見其略揣具本不勝其煩有志德禮之君子尚鑒于茲哉

工典總序

有國家者重民力節國用是以百工之事尚儉朴而貴適時用戒奢縱而慮傷人心安危興亡之機係焉故可不慎也六官之分工居其一請備事而書之一曰宮苑朝廷崇高正名分苑囿之作以宴以怡次二曰官府百官有司大小相承各有次舍以奉其職次三曰倉庫貢賦之入出納有恒慎其蓋藏有司之事次四曰城郭建邦設都有禦有禁都鄙之章君子是正次五曰橋梁

川陸之通以利行者君子為政力不虛捐次六曰河渠  
四方萬國達於京師鑿渠通舟輸載克敏次七曰郊廟  
辨方正位以建皇都郊廟祠祀爰奠其所次八曰僧寺  
竺乾之祠為惠為慈曰可福民寧不崇之次九曰道宮  
老上清淨流為禱祈有觀有宮有壇有祠次十曰廬帳  
廬帳之作比於宮室于野于處禁衛斯飭次十一曰兵  
器時既治平乃韜甲兵備于不虞庀工有程次十二曰  
鹵簿國有大禮鹵簿斯設儀繁物華萬夫就列次十三

曰玉工次十四曰金工次十五曰木工次十六曰搏埴  
之工次十七曰石工天降六府以足民用貴賤殊制法  
度見焉次十八曰絲枲之工次十九曰皮工次二十曰  
檀斲之工服用之備有絲有枲有皮有毛各精厥能次  
二十一曰畫塑之工次二十二曰諸匠像設之精締繪  
之文百技效能各有其屬

宮苑

國家龍飛朔土始於和林營萬安諸宮及定鼎幽燕乃

大建朝廷城郭宗廟宮室官府庫庾大內在國都之中  
以朝羣臣來萬方又以開平為上都夏行幸則至焉制  
度善矣中都建於至大間後亦希幸其它游觀之所離  
宮別館奢不踰侈儉而中度可考而見焉

### 官府

國家設官分職則各有聽政之所故上自省臺院部下  
而府司寺監以及乎外郡有司雖室宇之崇卑不等然  
其廳事之設施與夫史胥之按牘咸具其所而上下之

等辨矣

倉庫

國之有倉廩府庫所以為民也我朝倉庫之制以北則有上都宣德諸處自都而南則通州河西務御河及外郡常平諸倉以至甘州有倉鹽茶有局所供億京師賑恤黎庶者其措置之方可謂至矣

城郭

國家建元之初卜宅于燕因金故都時方經營中原未



暇建城郭厥後人物繁夥隘不足以容迺經營舊城東北而定鼎焉於是埤堞之崇樓櫓之雄池隍之浚高深中度勢成金湯而後上都中都諸城咸倣此而建焉

### 橋梁

都城初建庶事草創其內外橋梁皆架木為之而覆以土凡一百五十六至大德間年深木朽有司以為言改修用石都水監計料工部應付工物委官督工修理然後人無病涉之患

河渠

太史公河渠一書所以載水利者甚悉蓋水雖能為害  
然人得其疏導蓄泄之方以順其潤下之性則為利亦  
大矣國家定都幽燕上決白浮雙塔諸水道之為通惠  
河以濟漕運又為之立牐壩以節其盈涸舟楫既通而  
京師無告乏之弊至導渾河疏灤水而武清平灤無沒  
溺之患浚治河障滹沱而真定免決啗之虞開會通于  
臨清以通南北之貨疏陝西之三白以溉關中之田泄

江湖之淫潦立捍海之橫塘而涿右之民免墊溺之憂  
害既除利以興作河渠

### 郊廟

祀國之大事也故有國者必先立郊廟而社稷繼之我  
朝既遵古制而又有影堂焉有燒飯之院焉所以致其  
孝誠也至如祀孔子為宣聖太公為武成推而至於三  
皇亦咸為之廟食若太史司天之有臺城隍嶽瀆之有  
祠其所以答神休報靈貺之意則又至矣夫

僧寺

自僧法入中國為世所重而梵宇遍天下至我朝尤加  
崇敬室宮制度咸如帝王居而侈麗過之或賜以內帑  
或給之官幣雖所費不貲而莫與之較故其費棟連接  
簷宇翬飛金碧炫燿亘古莫及吁亦盛矣哉

道宮

老子之道以無為宗虛為祖知雄白而守雌黑故能柔  
強勝堅安危平險天下莫能窺萬物不敢臣孰是為右

契以御天下而天下莫之先舉世崇尚為之築宮室立  
臺榭固非一日其教雖有正一全真大道之殊而我朝  
尊寵之隆則與釋氏並乃若琳宇之穹崇璇宮之宏邃  
皆出於國家經費而莫之靳亦豈其道非常之所致歟

### 廬帳

我朝居朔方其俗逐水草無常居故為穹廬以便移徙  
後雖定邦邑建宮室而行幸上都春秋往返跋涉山川  
遂乃因故俗為帳殿房車以便行李其不欲興土木以

勞民之意亦仁矣哉

兵器

居安慮危有國之大戒安不忘戰有備則無患也故兵雖凶器而不可一日廢我朝承平日久四海晏然兵器似非所急者而弓弩戈甲之制歲為常貢率有定數其制作之工鋒刃犀利視苟安忘戰口不言兵器器械不精以卒與敵者蓋不侔矣

鹵簿

乘輿之出入有大駕法駕其儀衛森嚴警蹕清道非以自奉也所以敬神明嚴祖宗也豈直為觀美哉

玉工

中統二年勅徙和林白八里及諸路金玉礪礪諸工三千餘戶於大都立金玉局至元十一年陞諸路金玉工匠總管府掌造玉冊璽章御用金玉珠寶衣冠束帶器用几榻及后宮首飾凡賜賚頒上命然後製之

金工

攻金之工以煅鑄為職器以適用而等威之辨實行乎其間若符印以示信也而印鈕之制則有龍獸駢龜之別金銀銅雖異而又有三臺二臺之辨焉符牌之分金銀固也而有二珠雙簞之異如此而后品秩之崇卑較然有不可紊者矣其它如祭器以致敬銅人以驗鍼灸步占之渾儀沙門之佛像與凡器用之需莫不取給焉故雜造有府器物有局又立民匠總管以總之其制度亦詳矣哉



木工

木工之名則一而其藝有大小如營建宮室則大木之  
職也若舟車以濟不通几案以適用此皆小木之為也  
故鋸匠有局繕工有司民匠雜造之有府歲為定制以  
備用焉

搏埴之工

埴埴小藝也而其用至要宮室以蔽風雨而瓴甃是需  
故為窯場以埴埴之煅煉之而所用備矣

石工

夫石之為物其理麤其質堅故琢磨之工倍於玉而我朝攻石之工製以花卉鳥獸之像作為器用則務極其精巧云

絲枲之工

國朝治絲之工始自甲戌年間有史道安者精於其藝遂以御衣尚衣同為三局高麗諸王亦立局焉如異樣綾錦紗羅三提舉司又置府以總之其大都等路諸色

民匠及大都工匠隨路諸色民匠又各立府以督之其  
外道行省諸局雖不與此如御用諸王衆用者亦各有  
差常課之外不時之需謂之橫造然其染夏之工織造  
之制刺繡之文咸極其精緻焉

### 皮工

製皮為衣以禦寒也而大祀之用禮不可廢我朝起朔  
方都幽燕皆苦寒之地故皮服之需尤急乃設為寺監  
司局以專掌之而其采治之方裁製之巧則又非昔人

之所及也

殯殯


殯殯之用至廣也故以之蒙車馬以之藉地焉而鋪設障蔽之需咸以之故諸司寺監歲有定製以給用焉

畫塑

繪事後素此畫之序也而織以成像宛然如生有非采色塗抹所能及者以土像形又其次焉然後知工人之巧有奪造化之妙者矣

諸匠

國家初定中夏制作有程乃鳩天下之工聚之京師分類置局以考其程度而給之食復其戶使得以專於其藝故我朝諸工制作精巧咸勝往昔矣



元文類卷四十二

欽定四庫全書

集部

元文類卷四十三

詳校官通政使

臣 夢吉

助教臣常循覆勘

總校官庶吉士

臣 朱 鈐

校對官中書

臣

嵇承志

膳錄監生

臣

胡宗高

欽定四庫全書

元文類卷四十三

元 蘇天爵 編

雜著

四經序錄

易書詩春秋

吳 澂

易伏羲之易昔在皇羲始畫八卦因而重之為六十四  
當是時易有圖而無書也後聖因之作連山作歸藏作  
周易雖一本諸伏羲之圖而其取用蓋各不同焉三易  
既亡其二而周易獨存世儒誦習知有周易而已伏羲



之圖鮮或傳授而淪落于方伎家雖其說具見於夫子之繫辭說卦而讀者莫之察也至宋邵子始得而發揮之於是人乃知有伏羲之易而學易者不斷自文王周公始也今於易之一經首揭此圖冠於經端以為伏羲之易而後以三易繼之蓋欲使夫學者知易之本原不至徇流逐末而昧其所自云爾

連山夏之易周禮太卜掌三易一曰連山二曰歸藏三曰周易其經卦皆八其別皆六十有四或曰神農作連

山夏因之以其首艮故曰連山今亡

歸藏商之易子曰我欲觀殷道是故之宋而不足徵也  
吾得坤乾焉說者以坤乾為歸藏或曰黃帝作歸藏商  
因之以其首坤故曰歸藏今亡

周易上下經二篇文王周公作彖象繫辭上下文言說  
卦序卦雜卦傳十篇夫子作秦焚書周易以占筮獨存  
漢志易十二篇蓋經二傳十也自魏晉諸儒分彖象文  
言入經而易非古注疏傳誦者苟且仍循以逮於今宋

東萊先生呂氏始考之以復其舊而朱子因之第其文字闕衍謬誤未悉正也故今重加修訂視舊本頗為精善雖於大義不能有所損益而於羽翼遺經亦不為無小補云

書二十八篇漢伏生所口授者所謂今文書也伏生故為秦博士焚書時生壁藏之其後兵起流亡漢定生求其書亡數十篇獨得二十八篇以教授於齊魯之間孝文時求能治尚書者天下無有欲召生時年九十餘矣

不能行詔太常遣掌故晁錯往受之生老言不可曉使  
其女傳言教錯齊人語多與潁川異錯所不知凡十二  
三略以其意屬讀而已夫此二十八篇伏生口授而晁  
錯以意屬讀者也其間闕誤顛倒固多然不害其為古  
書也漢魏數百年間諸儒所治不過此爾當時以應二  
十八宿蓋不知二十八篇之外猶有書也東晉元帝時  
有豫章內史梅賾增多伏生書二十五篇稱為孔氏壁  
中古文鄭冲授之蘇愉愉授梁柳柳之內凡皇甫謐從

柳得之以授臧曹曹授梅賾賾遂奉上其書今攷傳記所引古書在二十五篇之內者鄭玄趙岐韋昭王肅杜預輩並指為逸書則是漢魏晉初諸儒曾未之見也故今特出伏氏二十八篇如舊以為漢儒所傳確然可信而晉世晚出之書別見于後以俟後之君子擇焉

書二十五篇晉梅賾所奏上者所謂古文書也書有今文古文之異何哉晁錯所受伏生書以隸寫之隸者當世通行之字也故曰今文魯恭王壞孔子宅得壁中所

藏皆科斗書科斗者倉頡所製之字也故曰古文然孔  
壁中真古文書不傳後有張霸偽作舜典汨作几共九  
篇大禹謨益稷五子之歌胤征湯誥咸有一德典寶伊  
訓肆命原命武成旅獒冏命二十四篇目為古文書漢  
藝文志云尚書經二十九篇古經十六卷二十九篇者  
即伏生今文書二十八篇及武帝時增偽泰誓一篇也  
古經十六卷者即張霸偽古文書二十四篇也漢儒所  
治不過伏生書及偽泰誓共二十九篇爾張霸偽古文

雖在而辭義蕪鄙不足取重於世以售其欺及梅賾二十五篇之書出則凡傳記所引書語注家指為逸書者收拾無遺既有證驗而其言率依於理比張霸偽書遼絕矣析伏氏書二十八篇為三十三雜以新出之書道為五十八篇并書序一篇凡五十九有孔安國傳及序世遂以為真孔壁所藏也唐初諸儒從而為之疏義自是以後漢世大小夏侯歐陽生所傳尚書止有二十九篇者廢不復行惟此孔氏傳五十八篇孤行於世伏氏

書既與梅賾所增混淆誰復能辨竊嘗讀之伏氏書雖難盡通然辭義古奧其為上古之書無疑梅賾所增二十五篇體製如出一手采集補綴雖無一字無所本而平緩卑弱殊不類先漢以前之文夫千年古書最晚乃出而字畫略無脫誤文勢略無齟齬不亦大可疑乎吳氏曰增多之書皆文從字順非若伏生之書詰曲贅牙夫四代之書作者不一乃至二人之手而定為二體其亦難言矣朱子曰書凡易讀者皆古文豈數百年壁中



之物不訛損一字者又曰伏生所傳皆難讀如何伏生偏記其所難而易者全不能記也又曰孔書至東晉方出前此諸儒皆未見可疑之甚又曰書序伏生時無之其文甚弱亦不是前漢人文字只似後漢末人又曰小序決非孔門之舊安國序亦非西漢文章又曰先漢文字重厚今大序格致極輕又曰尚書孔安國傳是魏晉間人作託安國為名耳又曰孔傳並序皆不類西京文字氣象與孔叢子同是一手偽書蓋其言多相表裏而

訓詁亦多出於小爾雅也夫以吳氏朱子之所疑者如此顧澂何敢質斯疑而斷斷然不敢信此二十五篇之為古書則是非之心不可得而昧也故今以此二十五篇自為卷袞以別於伏氏之書而小序各冠篇首者復合為一以寘其後孔氏序亦并附焉而因及其所可疑非澂之私言也聞之先儒云爾

詩風雅頌凡三百十一篇皆古之樂章六篇無辭者笙詩也舊蓋有譜以記其音節而今亡其三百五篇則歌

辭也樂有八物人聲為貴故樂有歌歌有辭鄉之樂歌  
曰風其詩乃國中男女道其情思之辭人心自然之樂  
也故先王采以入樂而被之弦歌朝廷之樂歌曰雅宗  
廟之樂歌曰頌於燕饗焉用之於會朝焉用之於享祀  
焉用之因是樂之施於是事故因是事而作為是辭也  
然則風因詩而為樂雅頌因樂而為詩詩之先後於樂  
不同其為歌辭一也經遭秦火樂亡而詩存漢儒以義  
說詩既不知詩之為樂矣而其所說之義亦豈能知詩

人命辭之本意哉由漢以來說三百篇之義者一本詩序詩序不知始於何人後儒從而增益之鄭氏謂序自為一編毛公分以真諸篇之首夫其初之自為一編也詩自詩序自序序之非經本旨者學者猶可考見及其分以真諸篇之首也則未讀經文先讀詩序序乃有似詩人所命之題而詩文反若因序以作於是讀者必索詩於序之中而誰復敢索詩於序之外者哉宋儒頗有覺其非者而莫能去也至朱子始深斥其失而去之然

後足以一洗千載之謬激嘗因是舍序而讀詩則雖不煩訓詁而意自明又嘗為之強詩以合序則雖曲生巧說而義愈晦是則序之有害於詩為多而朱子之有功於詩為甚大也今因朱子所定去各篇之序使不淆亂乎詩之正文學者因得以詩求詩而不為序說所惑若夫詩篇次第則文王之二南而間有平王以後之詩成王之雅頌而亦有康王以後之詩變雅之中而或有類乎正雅之辭者今既無從考据不敢輒為之紛更至若變

風雖入樂歌而未必皆有所用變雅或擬樂辭而未必  
皆為樂作其與風雅合編蓋因類附載云爾商頌商時  
詩也七月夏時詩也皆異代之辭故處頌詩風詩之末  
魯頌乃其臣作為樂歌以頌其君不得謂之風故係之  
頌周公居東時詩非擬朝廷樂歌而作不得謂之雅故  
附之幽風焉

春秋經十二篇左氏公羊穀梁文有不同昔朱子刻易  
書詩春秋於臨漳郡春秋一經止用左氏經文而曰公

穀二經所以異者類多人名地名而非大義所繫故不能悉具激竊謂三傳得失先儒固言之矣載事則左氏詳於公穀釋經則公穀精於左氏意者左氏必有按據之書而公穀多是傳聞之辭況人名地名之殊或繇語音字畫之舛此類壹從左氏是也然有考之於義的然見左氏為失而公穀為得者則又豈容以偏徇哉嗚呼聖人筆削魯史致謹於一字之微三家去夫子未久也文之脫謬已不能是正尚望其能有得於聖人之微意

哉漢儒專門守殘護闕不合不公誰復能貫穿異同而有所去取至唐啖助趙匡陸淳三子始能信經駁傳以聖人書法纂而為例得其義者十七八自漢以來未聞或之先也觀趙氏所定三傳異同用意密矣惜其予奪未能悉當間嘗再為審訂以成其美其間不繫乎大義者趙氏於三家從其多今則如朱氏意專以左氏為主儻義有不然則從其是左氏雖有事跡亦不從也一斷諸義而已嗚呼屬辭比事春秋教也激欲因啖趙陸



氏遺說博之以諸家參之以管見使人知聖筆有一定之法而是經無不通之例不敢隨文生義以侮聖言顧有此志而未暇就故先為正其史之文如此若聖人所取之義則俟同志者共講焉

三禮叙錄

儀禮周官小戴記大戴記

儀禮十七篇漢興高堂生得之以授瑕丘蕭奮奮授東海孟卿卿授后倉倉授戴德戴聖大戴小戴及劉氏別錄所傳十七篇次第各不同尊卑吉凶先後倫序惟別

錄為優故鄭氏用之今行於世禮經殘缺之餘獨此十  
七篇為完書以唐韓文公尚苦難讀況其下者自宋王  
文公行新經義廢黜此經學者益罕傳習朱子考定易  
書詩春秋四經而謂三禮體大未能叙正晚年欲成其  
書如此至惓惓也經傳通解乃其編類草槁將俟喪祭  
禮畢而筆削焉無祿弗逮遂為萬世之闕典激每伏讀  
而為之惋惜竊謂樂經既亡禮經僅存五易之彖傳象  
傳本與繫辭文言說卦序卦雜卦諸傳共為十翼居上

下經二篇之後者也而後人以八卦爻之中詩書之序  
本自為一篇居國風雅頌典謨誓誥之後者也而後人  
以冠各篇之首春秋三經三傳初皆別行公穀配經其  
來已久最後注左氏者又分傳以附經之年何居夫傳  
文序文與經混淆不惟非所以尊經且於文義多所梗  
礙歷千數百年而莫之或非也莫之或正也至東萊呂  
氏於易始因晁氏本定為經二篇傳十篇朱子於詩書  
各除篇端小序合而為一以寘經後春秋一經雖未暇

詳校而亦別出左氏經文併以刊之臨漳於是易書詩  
春秋悉復夫子之舊五經之中其未為諸儒所亂者惟  
二禮經然三百三千不存蓋十之九矣朱子補其遺闕  
則編類之初不得不以儀禮為綱而各疏其下脫彙之  
下必將有所科別決不但如今彙本而已若執彙本為  
定則經之章也而以後記補記補傳分隸分古於其左  
也與彖象傳之附易經者有以異乎否也夫以易書詩  
春秋之四經既幸而正而儀禮之一經又不幸而亂是

豈朱子之所以相遺經者哉徒知尊信草創之書而不能探索未盡之意亦豈朱子之所以望後學者哉嗚呼由朱子而來至于今將百年然而無有乎爾激之至愚不肖猶幸得以私淑於其書實受罔極之恩善繼者卒其未卒之志善述者成其未成之事抑亦職分之所當然也是以忘其僭妄輒因朱子所分禮章重加倫紀其經後之記依經章次秩叙其文不敢割裂一仍其舊附于篇終其十七篇次第並如鄭氏本更不間以它篇庶

十七篇正經不至雜糅二戴之記中有經篇者離之為  
逸經禮各有義則經之傳也以戴氏所存兼劉氏所補  
合之而為傳正經居首逸經次之傳終焉皆別為卷而  
不相紊此外悉以歸諸戴氏之記朱子所輯及黃氏喪  
禮楊氏祭禮亦參伍以去其重複名曰朱氏記而與二  
戴為三凡周公之典其未墜於地者蓋略包舉而無遺  
造化之運不息則天之所秩未必終古而廢壞有議禮  
制度考文者出所損所益百世可知也雖然苟非其人

禮不虛行存誠主敬致知力行下學而上達多學而一貫以得夫堯舜禹湯文武周孔之心俾吾朱子之學未流不至於漢儒學者事也澂也不敢自棄同志其尚敦勛之哉

儀禮逸經八篇澂所纂次漢興高堂生得儀禮十七篇後魯共王壞孔子宅得古文禮經於孔氏壁中凡五十六篇河間獻王得而上之具十七篇與儀禮正同餘三十九篇藏在祕府謂之逸禮哀帝初劉歆以列之學官

而諸博士不肯置對竟不得立孔鄭所引逸禮中留禮  
禘于太廟禮王居明堂禮皆其篇也唐初猶存諸儒曾  
不以為意遂至於亡惜哉今所纂八篇其二取之小戴  
記其三取之大戴記其三取之鄭氏注奔喪也中雷也  
禘于太廟也王居明堂也固得逸禮三十九篇之四而  
投壺之類未有考焉疑古禮逸者甚多不止於三十九  
也投壺奔喪篇首與儀禮諸篇之體如一公冠等三篇  
雖已不存此例蓋作記者刪取其要以入記非復正經



全篇矣投壺大小戴不同奔喪與逸禮亦異則知此二篇亦經刊削但未如公冠等篇之甚耳五篇之經文殆皆不完然實為禮經之正篇則不可以其不完而擯之於記故特纂為逸經以續十七篇之末至若中雷以下三篇其經亡矣而篇題僅僅見於注家片言隻字之未泯者猶必收拾而不敢遺亦我愛其禮之意也

儀禮傳十篇澂所纂次按儀禮有士冠禮士昏禮戴記則有冠義昏義儀禮有鄉飲酒禮鄉射禮大射禮戴記

則有鄉飲酒義射義以至於燕聘皆然蓋周末漢初之人作以釋儀禮而戴氏抄以入記者也今以此諸篇正為儀禮之傳故不以入記依儀禮篇次粹為一編文有不次者頗為更定射義一篇迭陳天子諸侯卿大夫士之射雜然無倫釐之為鄉射義大射義二篇士相見義公食大夫義則用清江劉氏原父所補並因朱子而加考詳焉於是儀禮之經自一至九經各有其傳矣惟觀義闕然大戴朝事一篇實釋諸侯朝覲天子及相朝之

禮故以備覲禮之義而共為傳十篇云

周官六篇具冬官一篇闕漢藝文志序列於禮家後人名曰周禮文帝嘗召至魏文侯時老樂工因得春官大司樂之章景帝子河間獻王好古學購得周官五篇武帝求遺書得之藏于祕府禮家諸儒皆莫之見哀帝時劉歆校理祕書始著于錄略以考工記補冬官之闕歆門人河南杜子春能通其讀鄭衆賈逵受業於杜漢末馬融傳之鄭玄玄所注今行於世宋張子程子甚尊信

之王文公又為新義朱子謂此經周公所作但當時行之恐未能盡後聖雖復損益可也至若肆為排觚訾毀之言則愚陋無知之人耳冬官雖闕今仍存其目而考工記別為一卷附之經後云

小戴記三十六篇澍所序次漢興得先儒所記禮書三百餘篇大戴氏刪合為八十五小戴氏又損益為四十三曲禮檀弓雜記分上下馬氏增以月令明堂位樂記鄭氏從而為之注總四十九篇精麤雜記靡所不有秦

火之餘區區掇拾所謂存十一於千百雖不能以皆醇然先王之遺制聖賢之格言往往賴之而存第其諸篇出於先儒著作之全書者無幾多是記者旁搜博采勦取殘編斷簡會粹成篇無復詮次讀者每病其雜亂而無章唐魏鄭公為是作類禮二十篇不知其書果何如也而不可得見朱子嘗與東萊先生呂氏商訂三禮篇次欲取戴記中有關於儀禮者附之經其不係於儀禮者仍別為記呂氏既不及答而朱子亦不及為幸其大

綱存於文集猶可攷也晚年編校儀禮經傳則其條例與前所商訂又不同矣其間所附戴記數篇或削本篇之文補以他篇之文今則不敢故止就本篇之中科分櫛剔以類相從俾其上下章文義聯屬章之大指標識于左庶讀者開卷瞭然若其篇第則大學中庸程子朱子既表章之以與論語孟子並而為四書固不容復廁之禮篇而投壺奔喪實為禮之正經亦不可以雜之於記其冠義昏義鄉飲酒義射義燕義聘義六篇正釋儀

禮別輯為傳以附經後矣此外猶三十六篇曰通禮者  
凡曲禮內則少儀玉藻通記小大儀文而深衣附焉月  
令王制專記國家制度而文王世子明堂位附焉曰喪  
禮者十有一喪大記雜記喪服小記服問檀弓曾子問  
六篇記喪而大傳間傳問喪三年問喪服四制五篇則  
喪之義也曰祭禮者四祭法一篇記祭而郊特牲祭義  
祭統三篇則祭之義也曰通論者十有二禮運禮器經  
解一類哀公問仲尼燕居孔子閒居一類坊記表記緇

衣一類儒行自為一類學記樂記其文雅馴非諸篇比則以為是書之終嗚呼由漢以來此書千有餘歲矣而其顛倒糾紛至朱子始欲為之是正而未及竟豈無望於後之人歟用敢竊取其義修而成之篇章文句秩然有倫先後始終頗為精審將來學禮之君子於此考信或有取乎非但為戴氏忠臣而已也

大戴記三十四篇澂所序次按隋志大戴記八十五篇今具書闕前三十八篇始三十九終八十一當為四十



三篇中間第四十三第四十四第四十五第六十一四篇復闕第七十三有二總四十篇據云八十五篇則末又闕其四或云止八十一皆不可考竊意大戴類粹此記多為小戴所取後人合其餘篇仍為大戴記已入小戴記者不復錄而闕其篇是以其書冗泛不及小戴書甚蓋彼其膏華而此其查滓爾然尚或間存精語不可棄遺其與小戴重者投壺哀公問也投壺公冠諸侯遷廟諸侯釁廟四篇既入儀禮逸經朝事一篇又入儀禮

傳哀公問小戴已取之則於彼宜存於此宜去此外猶三十四篇夏小正猶月令也明堂猶明堂位也本命以下雜錄事辭多與家語荀子賈傳等書相出入非專為記禮設禮運以下諸篇之比也小戴文多綴補而此皆成篇故具篇中章句罕所更定惟其文字錯誤參互考校未能盡正尚以俟好古博學之君子云

春秋諸國統紀序錄

齊履謙

孔子嘗曰我欲觀夏道是故之杞而不足證也我欲觀

商道是故之宋而不足證也我觀周道幽厲傷之吾舍  
魯何適矣此聖人所以託魯史以寓王法也故學春秋  
者當先觀聖人所書一魯十二公二百有四十二年之  
事其文可證也其誼可推也其治亂得失反復一代之  
變可覆而視也始於隱元者魯史之所自起也志禮樂  
志征伐志會盟志賦稅志軍甲志城築志田邑志災異  
志世卿志夫人內女獨備於諸國者非特為詳內錄也  
夫以春秋而視周典則魯為極亂以魯而視當時齊晉

諸國則豈無所謂一變再變至道難易之等差哉因其  
事著其筆削蓋所以訓也後之作者尚有考於斯故叙  
魯國春秋統紀第一

詩降黍離於國風示天下不復有雅春秋夷周室於侯  
邦傷王道莫之能亢也當是時周史固在也十三王之  
世次先後可考也然而春秋不以周統書元而但以周  
正首事其意可知也書歸物者三書來求者三書錫命  
者三書出師者三書天王出居于鄭繼書天王居于狄

泉入于成周書王札子殺召伯毛伯書天王殺其弟佖  
夫繼書王室亂王子猛卒德日脗力日蹙變日極矣孔  
子曰如有用我者我其為東周乎蓋傷周室陵遲雖有  
繼世之王亦不能以復興矣此制作之本旨也豈有禮  
樂征伐不自己而出哉故叙周王春秋統紀第二

公羊氏曰大國言齊宋夫宋王者之後而中國之望也  
陳舜之後也杞夏之後也宋商之後也原其始封皆公  
爵也而在春秋陳但稱侯杞則始稱侯至莊之二十七

年書伯僖之二十三年降而書子訖春秋之世凡三書而三降焉惟宋獨終始公爵雖襄公圖霸無功戰敗身傷而宋為諸侯之望曾不改舊故晉文以解宋圍而成一戰之霸悼公以討魚石而興三駕之功春秋外平不書至宋楚平則書之其大勢可見矣故叙宋國春秋統紀第三

五霸前此未有也齊創之而晉次之也雖然當是時也王道衰諸侯恣威勢以相脅傾詐以相尚天下皆是也

大則宋魯衛鄭之邦小則邾莒滕薛之國其能知尊周者誰歟以禮為國者誰歟推其本心無非桓文也考其行事亦無非桓文也其所以不為桓文者非不欲也特智有所不逮力有所不及耳故孟子論春秋不舉他國而獨以二公為稱者意蓋如此故叙齊國春秋統紀第四

近代永嘉陳氏有言古者諸侯無私史晉之乘楚之檮杌魯之春秋皆東遷之史也今以此言考之春秋凡諸

侯書卒者皆有國史以考其世次者也其不書卒者或國滅失其本史或國雖在而未有史皆無所考其世次者也又其世次有入春秋即見者有近後方有者若秦至文十八年始書康公卒薛至莊三十一年始書薛伯卒杞至僖二十三年始書成公卒莒至成十四年始書渠丘公卒邾至莊十六年始書邾子克卒許至僖四年始書穆公卒楚至宣十八年始書莊王卒吳至襄十二年始書王壽夢卒晉則至僖九年始書獻公卒凡此其



史之所起有久近故其世次所書有先後然則陳氏之言於是乎信故叙晉國春秋統紀第五

子路問於孔子曰衛君待子而為政子將奚先孔子曰必也正名乎名不正則言不順事不成禮樂不興刑罰不中而民無所措手足夫靈公黜其子而子具孫出公不父具父而禰其祖蒯瞶爭入曼姑圍戚至此則人倫之不正甚矣故夫子因子路之問而啟之然此言也雖則專為衛輒而發夷考春秋所書若州吁若惠公若公

孫剽本其禍亂無非不知正名之罪然後知夫子之言  
所包者廣非止於一人一事而已也不然衛以康叔封  
國察其政俗兄弟吾魯加以內無專國之臣外少諸侯  
之事於斯時也苟能君君臣臣父父子子兄兄弟弟夫  
夫婦婦人倫之無不適其正也其於禮樂之興也何有  
故叙衛國春秋統紀第六

古者王制諸侯之爵次其先後有序在周官大司馬設  
儀辨位以等邦國猶天建地設不可亂也及春秋時禮

制既亡霸者以意之向背為升降諸國以勢之強弱相  
上下故自入春秋蔡常先衛隱十年伐戴書宋人蔡人  
衛人桓五年伐鄭書蔡人衛人陳人十四年又伐鄭書  
齊人蔡人衛人陳人十六年會于曹猶書宋公蔡侯衛  
侯皆先衛也自是厥後伐鄭之役納衛惠之師遂序於  
衛陳之下矣雖云至有後先亦以國勢孱弱不能自強  
於治可見矣其世從楚而受楚禍也宜哉故叙蔡國春  
秋統紀第七

春秋赴告之說始於左氏其言曰諸侯有命告則書不然則否師出臧否亦如之雖及滅國滅不告敗勝不告克不書于策其意本謂鄰國相好或同惡以相仇或同利以相濟於是乎有赴告之命如傳言宋人取邾田邾人告於鄭曰請君釋憾於宋敝邑為道鄭人以王命告伐宋之類非謂每事每國必先赴告凡春秋所有事皆當時承赴告而書者誠如此言不惟當時諸國封壤有遠近情好有疎密而且國有諱忌事固有不可告與夫

不當害及不能告者而春秋備書之桓五年春正月甲戌己丑陳侯鮑卒甲戌之下本闕陳佗作亂事而左傳以謂陳亂國人分散故再赴昭九年夏四月陳災陳亡矣定無來告者而胡氏以謂叔弓會楚子于陳還言之朝凡若此者皆泥於赴告之說之弊也要之春秋之作各從本史於理為通赴告之說恐不盡然也故叙陳國春秋統紀第八

鄭在春秋列國最為後封於諸姬為近然當春秋之初

鄭為亂階書克段書來輸平書歸祊書假許田書從王  
伐鄭皆特筆也其後方楚之北征諸夏而鄭與陳蔡許  
四國適當其衝陳蔡許終始春秋甘為楚之從而鄭介  
晉楚之間居二國必爭之地朝從楚盟晉師暮至暮從  
晉盟楚師朝至其為國也難哉向非子產以禮自固使  
晉楚之暴不能加焉則鄭國之丘墟當不終於春秋矣  
善乎劉安世之論曰鄭蕞爾國又時有君臣之亂得子  
產然後安然子產為政時晉楚漸衰又能事之區區小

國攝乎大國之間自能保已為難若妄作則滅亡矣傳稱子產善相小國謂此也故叙鄭國春秋統紀第九

春秋之用兵輕重淺深各有不同而其甚莫極於滅滅者亡國之重辭也宋景公入曹以曹伯陽歸春秋上書入而左氏傳其事謂曹伯陽好田弋鄙人公孫彊因進田弋之說陽好之彊因言霸說陽乃背晉而好宋宋伐之晉不救而遂滅故嘗因是考之經有書滅而實未嘗滅者襄六年書莒人滅鄆昭四年書取鄆是則鄆未嘗

滅定六年春鄭游速帥師滅許以許男斯歸哀三年書  
許男成卒則是許未嘗滅亦有經書入而傳則謂滅國  
亦不復見者僖三十年書秦人入滑傳謂滅滑而還而  
滑亦不復見哀八年書宋公入曹傳謂晉不救而遂滅  
而曹亦不復見蓋未嘗滅者或復存之其入而國不復  
見者皆自亡也故叙曹國春秋統紀第十

秦自穆公始入春秋僖十五年與晉惠公戰于韓原其  
勢固已悍然矣及再納晉文主盟中華穆公外雖從晉



盟會內則蓄其威武投間抵隙待時而發故文公方卒  
今年滅滑明年伐晉用敗穀之師出罪己之言威行東  
夏奄宅西戎斯可謂秦之顯公矣故春秋秦自彭衙以  
前入滑圖鄭盟于翟泉會于溫師于城濮凡穆公之事  
莫不皆備錄之康共而下則若有不盡記者非闕文也  
直謂其不足詳耳故叙秦國春秋統記第十一

春秋降爵之國薛自侯降為伯滕自侯降為子杞自公  
降為侯又降為伯又降為子雖其所以降不可知固以

見其國勢朘削日就卑替或曰薛與滕杞自入春秋不與諸侯會盟者各百餘年至成五年蟲牢始書杞伯成十三年伐秦始書滕人襄元年圍彭城始書薛人其曰日就卑替者何也曰是又不然夫春秋之有會盟本所以控大國扶小國也故其徵令不濫而諸侯有序葵丘之盟盟之大者也而與盟者止於八國杞滕薛不在焉踐土之盟亦盟之大者也而與盟者亦止於八國杞滕薛亦不在焉此桓文之盛而小國所以賴也霸政下衰

盟會數而賦役煩雖大國容有不至而小弱如杞滕薛之倫莫不奔走而聽命雖空乏其國家困踣於道路而有不遑恤者且宋災細故也為會而更所喪者十有二國也城杞末務也相率而受其功者亦十有二國也甚而至於晉定之召陵之後在會者十有八國而劉子且不數焉其得失可知也由是言之其得與於會盟者非進之也適所以就其卑替耳故叙薛國春秋統紀第十

二

杞既降而書子矣而又退從人臣之列具降而書子吾不知其所從來退從人臣之列則有任其責者矣何以其退從人臣之列也以襄二十九年書杞子來盟則見之也經有書來盟者矣桓十四年鄭語來盟閔二年齊高子來盟僖四年楚屈完來盟文十五年宋華孫來盟宣七年衛孫良夫來盟皆人臣也故未有諸侯書來盟者亦未有與諸侯盟而不書公者也左氏曰杞文公來盟書曰子賤之也此說非也賤之之意其不在於書子

也夫杞夏之後而天子之事守也禮秩之降一至於此  
宜乎夫子嘗曰吾說夏禮杞不足徵也故叙杞國春秋  
統紀第十三

春秋以諸侯而旅見於諸侯惟二事滕侯薛侯邾人牟  
人葛人是也何以知為旅見即其所書而知之也古者  
諸侯之邦交名位不同禮亦異數至於旅見則必均其  
辭號者所以一貴賤齊等威也然則謂之侯者以君禮  
見者也不謂之侯者不以君禮見者也滕本非侯也薛

亦然或者之說有如此者故叙滕國春秋統紀第十四  
莒介居齊魯之境齊雖見伐而莒曾不敢少陵齊焉魯  
則自宣公平莒及邾莒人不肯至再會齊伐之干戈相  
尋迄無寧歲當襄公之世曾不數年而莒人伐我者三  
侵我者一亦可謂之強國矣故春秋書莒每次於鄭曹  
之下至於入向取牟婁滅鄭皆強國事也故叙莒國春  
秋統紀第十五

春秋世卿非惟大國有之雖小國亦有之矣莒牟夷邾

庶其畀我邾快黑弓是也若邾儀父或以為子克字或以為大夫之名按魯有行父歸父晉有林父鄭父甲父是皆大夫名然則謂儀父為名者非無據也夫邾魯附庸之國其來朝於魯者數矣而魯之君臣所以每加兵於邾者其意責邾之不恭猶深也故既納其邑又分其田既又入國而以其君歸必期至於滅亡而後已豈先王保小寡之道哉公行鮮有不書至者惟伐邾則悉不書至豈以邾為邦域之中七百里之內與故叙邾國春

秋統紀第十六

春秋之班齊侯爵也自入僖公常序于宋公之上邾子爵也常序于薛伯之上許男爵也常序于曹伯之上復有在邢侯之上者甚而至於蜀之盟秦序宋上鄭序齊上皆習亂之事也故統紀自內魯至於降周而下並依王爵曰公曰侯曰伯曰子曰男爵同以親晉當先齊以齊為霸者之倡特列居侯爵之首荆吳僭號王爵不加焉故附于五等之後凡此庶幾春秋聖人所以道名分




之意云故叙許國春秋統紀第十七

春秋自遷不書有遷之者而後書然書曰某人遷某者  
遷以內屬也宋人遷宿齊人遷陽是也書曰某遷于某  
者遷以避難也邢遷于夷儀衛遷于帝丘蔡遷于州來  
許遷于葉于白羽于容城是也雖所遷不同而其國之  
危弱不能自守一也悲夫故叙宿國春秋統紀第十八  
荆吳僭竊名號不與中國通者各十餘世自入春秋雖  
其因事制宜誼存筆削然其君書卒其大夫書名書聘

使書會盟書帥師皆與諸夏冠帶之國並列無間蓋二國之罪以先王王法論之則外之攘之誅之絕之可也以春秋信史言之則聖人拳拳於夷夏盛衰之變者深矣詳其事存其實錄所以為後世鑒也故其書法如此故叙楚國春秋統紀第十九

吳國于東南去中夏尤遠成七年吳伐郢始見於經于鍾離于善道于祖于向皆諸侯就而會之其來交于中國者于戚而止耳雖則資之以疲楚然吳亦亢矣艾陵

之戰齊黃池之駕晉其末流有必至者春秋書之欲後  
世謹其始也故叙吳國春秋統紀第二十



元文類卷四十三

欽定四庫全書

集部

元文類卷四十五

詳校官通政使<sub>臣</sub>夢吉

助教<sub>臣</sub>常循覆勘

總校官庶吉士<sub>臣</sub>朱鈐

校對官中書<sub>臣</sub>嵇承志

謄錄監生<sub>臣</sub>胡宗高

欽定四庫全書

元文類卷四十四

元 蘇天爵 編

雜著

讀易私言

許衡

初初位之下事之始也以陽居之才可以有為矣或恐其不安於分也以陰居之不患其過越矣或恐其悞

弱昏滯未足以趨時也四之應否亦類此義

無應則或困於

弱有應則或傷於躁坎無應而凶頭有應而凶之類也

大抵柔弱則難濟剛健

則易行故諸卦柔弱而致凶者其數居多

豫剝坎恒困井旅小

過未濟

剛健而致凶者惟頤大壯夬而已若總言之居

初者易貞居上者難貞易貞者由其所適之道多難  
貞者以其所處之位極故六十四卦初爻多得免咎  
而上每有不可救者始終之際其難易之不同蓋如  
此

艮六居初者凡八陰柔處下而其性好止故在謙則  
合時義而得吉在咸則感未深而不足進也以是才

居遯則後於人而有厲然位卑力弱返不若不往之  
之為愈也蹇之時險在前也止而不往自有知幾之  
譽免於進則陷乎險也艮以止於初為義故但戒以  
利永貞漸之才宜若此也雖小子有言於義何咎旅  
雖有應而不足援也斯其所以瑣乎小過宜下而反  
應於上斯具有飛鳥之凶乎柔止之才大率不宜動  
而有應動而有應則應反為之累矣

謙最吉小  
過最凶

坤六居初者凡八坤柔順處下其初甚微而其積甚

著故其處比與否之初也皆獲吉豫有應在上是動於欲而不安其分也凶亦宜乎

二二與四皆陰位也四雖得正而猶有不中之累況不得其正乎二雖不正而猶有得中之美況正而得中者乎四近君之臣也二遠君之臣也其勢又不同此二之所以多譽四之所以多懼也二中位陰陽處之皆為得中中者不偏不倚無過不及之謂其才若此故於時義為易合時義既合則吉可斷矣究而言之



凡為陽者本吉也陽雖本吉不得其正則有害乎其  
吉矣雖得正矣不及其中亦未可保其吉也必也當  
位居中能趨時義然後其吉乃定凡為陰者本凶也  
陰雖本凶不失其正則緩乎其凶矣苟或居中猶可  
免其凶也必也不正不中悖於時義然後其凶乃定  
故陽得位得中者其吉多焉陰失位失中者其凶多  
焉要其終也合於時義則無不吉悖於時義則無不  
凶也大矣哉時之義乎

凡陽本吉凡陰本凶陽雖本吉不得其正則害乎吉  
矣得正矣不及其中亦未保其吉也必當位居中能  
趨時義然後其吉乃定陰雖本凶不失其正則緩其  
凶矣失正矣或能居中猶可免其凶也必也不正不  
中悖於時義然後其凶乃定故陽得位得中其吉多  
焉陰失位失中其凶多焉要其終也合於時義則無  
不吉悖於時義則無不凶也大矣哉時之義乎

一本  
究而

言之以下文少不同故  
重錄如上以備參考

乾九二九剛健之才也而承乘又剛健是剛健之至也處陰得中有溥博淵泉時出之義臣才若此其於職位蓋綽綽然有餘裕矣夫剛健則有可久之義得中則有適時之義兼二者而得雖無應可也況六五虛中以待已者乎此八卦所以無悔吝而有應者尤為美也

兌九二兌之九二剛而得中也雖上承於柔邪不足為累以此得中之義為務也獨節之為卦自有中義

所不足者正而已今既不正矣其何以免於凶乎

巽九二允之中以剛為說巽之中以剛為入皆有才

適用之中也然允務於上

上一陰為主

巽務於下

下一陰為主

其勢有所不通如井之義貴於上行也而九二無應  
徇已才而下之違時拂義人莫肯與以谷射甕敝取  
象其亦宜乎

坎九二下柔險之始也上柔險之極也而已以剛陽  
之才獨處中焉是已無賴於彼而彼有待於已也如

以至尊應之則險道大行不爾則幾於困矣大率有應而道行則以貞幹之義為重無應而處中則以須守之義為重錯舉而言則卦才皆備焉

坤六二否之時不為窮厄所動豫之時不為逸欲所牽非安於義分者莫能也坤六二居中履正且又靜而順焉宜其處此而無敗也雖然創物兼人陽之為也柔順貞靜陰之德也以陰之德而遇剝觀則剝傷於柔而觀失於固矣夫何故時既不同義亦隨異此六爻所以貴

中正而中正之中又有隨時之義也

震六二六二陰柔而在動體雖居中履正然下乘剛陽成卦之主其勢不得安而處也非惟其勢不得安而處揆其資性亦不肯安其處也或上應或下依有失得之辨焉復無應而下依吉之道也過此則違道而非正矣頤隨益之方受彼也上下之來又何患焉無妄之世方存誠也或應或依祇足為累他卦皆以乘剛之義為重也屯震噬嗑大率處則乘剛動有得失非坤

二柔中之比也

艮六二以剛處上以柔處下尊卑之勢順也艮之大體既備此象矣而六二又承剛履柔居中得正宜其處諸卦而無過也雖然柔止之才動拘禮制若當大有為之時則有不可必者固在蹇未能濟處艮莫能止究其用心忠義正直終不可以事之成否為累也離六二初與三剛而得正皆有為之才也然其明照各滯一偏唯六二中正見義理之當然而其才幹有

不逮其明者甚矣智之難齊也得有應於上則明有所附矣然非剛之善用明實明之能自用也大抵以剛用明不若以明用剛之為順故八卦應五附三其勢略等而離之六五有應於下者為最美也

三卦爻六位唯三為難處蓋上下之交內外之際非平易安和之所也故在乾則失於剛暴在坤則傷於柔邪震動而無恒巽躁而或屈離與艮明止係於一偏坎與兌險說至於過極皆凶之道也然乾之健雖不



中也猶可勝任坤之順雖不正也猶能下人二者之  
凶比他又為少緩若夫坎之與兌以陰處陽以柔乘  
剛不中不正悖忤時義其為凶也切矣是知乾坤為  
輕坎兌為重總而論之亦曰多凶而已矣

乾九三過剛而不中難與義適然以其有才也故諄  
諄焉戒命之曰夕惕曰敬慎曰艱貞庶乎有可免者  
不然則用所偏而違乎義矣凶其可逃乎

四四之位近君多懼之地也以柔居之則有順從之美

以剛居之則有僭逼之嫌然又須問居五者陰邪陽邪以陰承陽則得於君而勢順以陽承陰則得於君而勢逆勢順則無不可也勢逆則尤忌上行上行則凶咎必至離之諸四皆是也震則四為成卦之主才幹之臣也是動而知戒是以有補過之道以陽承陽以陰承陰皆不得於君也然陽以不正而有才陰以得正而無才故其勢不同有才而不正則貴於寡欲故乾之諸四例得免咎而隨之四夬之四有凶悔之

辭焉無才而得正則貴乎有應故艮之諸四皆有應為優無應為劣獨坤之諸四能以柔順處之雖無應援亦皆免咎此又隨時之義也

乾九四九而居四勢本不順然以其健而有才焉故不難於趨義又上卦之初未至過極故多為以剛用柔之義以剛而用柔是有才而能戒懼也有才而能戒懼雖不正猶吉也

兌九四處下而說則有樂天之美處上而說則有慕

爵之嫌初九雖無應猶可也九四雖有應尚多戒辭也然以剛說之才易得勝任故有應者無不吉而無應者亦有免之之道云

離九四陽處近君而能保其吉者以其有才而敬慎故也火性上炎動成躁急非惟不順君之所用且反為君之所忌也恣橫專悞鮮有不及唯噬嗑之去間睽離之相保與羈旅而親寡之時取君義為甚輕故其所失亦比他爻為甚緩究而言之固非本善之才

也

震九四離之成卦在乎中故以中為美震之成卦在乎下故以下為貴若是則震之九四乃才幹之臣也君之動由之師之動亦由之其功且大矣其位已逼矣然而卒保其無禍者何哉蓋震而近臣君有戒慎恐懼之義以陽處陰有體剛用柔之義持其術以往其多功而寡過也宜乎雖然功大位逼而不正不可以久居其所也久居其所則勲德反下此恒之所以

戒於田無禽歟

巽六四陰柔之質自多懼也順入之才能承君也是而處每堪其任故八卦皆無凶悔之辭

坎六四其以陰柔得位而上承中正之君略與巽同然又有險之性焉此以處多懼之地則宜矣故八卦亦無凶悔之辭

一作陰承陽其勢已順而具才質且能周還曲折不違於正道是宜處多懼而無咎也

艮六四以柔止之才承柔止之君雖已身得正而於君事則有不能自濟者必藉剛陽之才而後可以成

功故離九應之則終得婚媾震九應之則顛頤獲吉  
至於止乾之健納兌之說皆可成功而有喜不爾處  
剝見凶處蒙蠱見吝矣艮以能止為義能止其身則  
无咎可也

坤六四坤之六四不問有應與否皆無凶咎蓋為臣  
之道大體主順不順則無以事君也

五五上卦之中乃人君之位也諸爻之德莫精於此故  
在乾則剛健而斷在坤則重厚而順未或有先之者

至於坎險之孚誠離麗之文明巽順於理艮篤於實  
能首出乎庶物不問何時克濟大事傳謂五多功者  
此也獨震忌強輔允比小人於君道未善觀其戒之  
之辭則可知

乾九五剛健中正得處君位不問何時皆無悔咎惟  
履之剛決同人之私暱不合君道故有厲有號咷也  
允九五下履不正之強輔上比柔邪之小人非君之  
善道也然以其中正也故下有忌而可勝上有說而



可決大哉中正之為德乎

離六五強輔強師而六以文明柔中之才而麗之悔  
可亡也事可濟也然更得九二應之為貴故大有睽  
鼎未濟皆吉而他卦止以得中為免耳

震六五九四陽剛不正之臣為動之主而六五以柔  
中乘之其勢可嫌也得九二剛中應之其勢頗振動  
故恒大壯解歸妹比他卦為優而豐之二五以明動  
相資故其辭亦異焉勝於豫震小過之無應也

巽九五以巽順處中正又君臣相得而剛柔相濟相得則無內難相濟則有成功不待於應自可无咎應則尤為美也以巽順之道處中正之位君與臣相得也剛與柔相濟也相得則無內起之難相濟則有成功之理不待於應而自能無咎也

坎九五以陽剛之才處極尊之位中而且正可以有為也然適在險中未能遽出故諸卦皆有須待之義夫能為者才也得為者位也可為者時也有才位而

無其時唯待為可待而至於可則無咎矣

艮六五君輔皆柔且無相得之義本不可有為也以  
六有靜止得中之才上依而下任也故僅能成功然  
非可大有為也更或無應是不得於臣又不得於民  
於君道何取焉

坤六五坤六居五雖不當位然柔順重厚合於時中  
有君人之度焉得九二剛中應之則事乃可濟故師  
泰臨升或吉或無咎而他卦則戒之之辭為尤重蓋

陰柔之才不克大事且鮮能永貞故也

上上事之終時之極也其才之剛柔與內之應否雖或

取義然終莫及上與終之重也是故難之將出者則

指其可由之方否解困事之既成者則示以可保之

道蠱无妄頤時甚足貴也隨離時過適則難與行也

乾坤小畜泰節中孚大畜義之善或不勸則直云

其吉也大有剝大勢之惡或不可解則但言其凶也

屯訟比噬嗑復坎明夷有始不得志而終無咎者

同人

有始饜其欲而終有禍敗者

萃

制其偏而用者

才尚可也

升蒙晉

反其常而動者事已窮也

師謙

質雖

不美而冀其或改焉則猶告之

豫大壯

位雖處極而

見其可行焉則亦諭之

需

艮有成終之義故八卦皆

善

蒙蠱賁剝大畜頤損艮

履係於所履觀係於所生吉凶不敢

主言也大抵積微而盛過盛而衰有不可變者有不能不變者六爻教戒之辭唯此為最少大傳謂其上易知豈非事之已成乎

東西周辨

吳澂

東西周有二一以前後建都之殊而名一以二公封邑之殊而名昔武王西都鎬京而東定鼎於邲鄘周公相成王宅洛邑營澗水東澠水西以朝諸侯謂之王城又謂之東都實邲鄘於今為河南又營澠水東以之處殷頑民謂之成周又謂之下都於今為洛陽自武至幽皆都鎬京幽王娶於申生太子宜臼又嬖褒姒生伯服欲立之黜宜臼申侯以酈及犬戎入寇弑王諸侯逐犬戎

與申侯共立宜臼是為平王畏戎之逼去鎬而遷於東都平以下都王城曰東周幽以上都鎬京曰西周此以前後建都之殊而名也自平東遷傳世十二而景王之庶長子朝與王猛爭國猛東居于皇晉師納之入于王城入之次月猛終焉及踰半期而子朝又入王辟之東居于狄泉子朝據王城曰西王敬王在狄泉曰東王越四年子朝奔楚敬王雖得返國然以子朝餘黨多在王城乃徙都成周而王城之都廢至考王封其弟揭於王

城以續周公之官職是為周桓公自此以後東有王西

有公而東西周之名未立也桓公生威公威公生惠公

惠公之少子班又別封于鞏以奉王是為東周惠公

父子

同諡以鞏與成周皆在王城之東故班之兄則仍襲父爵

居于王城是為西周武公以王城在成周之西故自此

以後西有公東亦有公二公各有所食而周尚為一也

顯王二年趙韓分周地為二二周公治之王寄焉而已

矣周之分東西自此始九年東周惠公卒子傑嗣慎觀



以上皆在東周赧王立始遷于西周即王城舊都也

史記

云王赧時東西周分治今按顯王二年已分為二不待此時矣其後西周武公卒子文

君嗣王五十九年秦滅西周西周公入秦獻其邑而歸

是年赧王崩次年周民東亡秦遷西周公於黽狐聚又

六年秦滅東周遷東周公於陽人聚此以二公封邑之

殊而名也前後建都之殊者以鎬京為西周對洛邑為

東周而言也二公封邑之殊者又於洛邑二城之中以

王城為西周對成周為東周而言也大槩周三十六王

前十有二王都鎬京中十有三王都王城王城對鎬京  
則鎬京在西而王城在東其東西之相望也遠季十王  
都成周赧一王都王城王城對成周則成周在東而王  
城在西其東西之相距也近一王城也昔以東周稱今  
以西周稱夫周末東西之分因武惠二公各居一都而  
名王則或東或西東西之名繫乎公不繫乎王也邵子  
經世書紀赧王為西周君與東周惠公並而西周公無  
聞焉則直以西為王東為公矣知東之有公而不知西

之亦有公也知王之在西而不知赧以前之王固在東也戰國策編題首東周次西周豈無意哉二周分治以來顯王慎覲王二代五十餘年王於東赧一代五十餘年王於西先東後西順其序也近有縉雲鮑彪註謂西周正統不應後於東周升之為首卷於西著王世次於東著公世次蓋因邵子而誤者既不知有西周公且承宋忠之謬以西周武公為赧王別謚反以徐廣為疎是未嘗考於司馬貞索隱之說鮑又云赧徙都西周西周

鎬京也嗚呼鎬京去王城成周八百餘里自平王東遷之後不能有而以命秦仲曰能逐犬戎即有其地鎬之於秦已四百年於茲其地在長安上林昆明之北虎狼所穴而王得往都於彼哉高誘註曰西周王城今河南東周成周故洛陽辭旨明甚鮑注出高誘後何乃以西周為鎬京也乎鮑又云邲鄆屬河南為東周殊不思此昔時所謂東周也於斯時則名西周矣斯時之西周與鎬京邲鄆對稱西東者不同顧乃一之何歟蓋有不知

而作者我無是也夫鮑氏之於國策其用心甚勤而開卷之端不免謬誤如此讀者亦或未之察也與夾谷士常程鉅夫偶論及此二公命筆之遂為之作東西周辯

改月數議

張敷言

或謂三代改正朔無異議月數之改諸儒議論不一學者病焉亦嘗考之乎曰夏商之制世遠無文不可深究周制尚可得而言之謂不改可乎曰可何以徵之四月維夏六月徂暑周詩甚明謂之改可乎曰可何以徵之

孟子書七八月之間旱春秋正月日南至二月無冰之類是也然則無定論乎曰有間者伏讀春秋至春王正月竊有疑焉夫正月固王之正月如後世史書正月即時王之正月也何假稱王竊意必其別有所謂正月者故稱王以別之及讀僖五年晉獻公伐虢以克敵之期問於卜偃荅以九月十月之交考之童謠星象之驗皆是夏正十月而其傳迺書在十二月其改月明矣又襄公三十年絳老人自實其年稱臣生之歲正月甲子朔

于今四百四十五甲子矣其季三之一所稱正月亦是  
夏正寅月孔疏甚明文多不載考之老人所歷正七十  
三年二萬六千六百六十六日當盡丑月癸未其傳迺  
書在二月其改月又明矣然卜偃老人併是周人一則  
對君一則對執政大夫其歲月又二事中之切用非若  
他事泛言月日何故舍時王之正月月數而言夏正哉  
聽之者亦何故都不致詰即知為寅月起數哉因是以  
知周之正朔月數皆改必其朝覲聘問頒朔授時凡筆

之於史冊者即用時王正月月數其民俗之歲時相語之話言則皆以寅月起數如後世者自若也而春秋書王正月以別民俗為無疑周人之詩孟子之書亦各有所取也不然諸儒之論各執所見主改者遇不改之文則沒而不書主不改者遇改月之議則諱而不錄終不能曉然相通以祛學者之惑曰周以子月為正為一月信矣以為春乎曰然寒暑反易可乎曰未也先王之制易姓受命必改正朔易衣色殊徽號新民之耳目以權



一時之宜非謂冬必為春子之一月便可祈穀上帝矣

便可犧牲不用牝矣曰有未安乎曰固也不然夫子不

曰行夏之時矣周公作禮正月之後不復曰正歲矣

凌人

正歲十有二月令斬冰最可考既以寅月為正歲則子月為權宜得矣

說正歲者不謂夏

得四時之正殷周不得矣必有復以子丑之月為正者

矣

唐武氏雖嘗以子月為正却未嘗改時月肅宗以子月為歲首斗建紀月但行一年目

日子謂

必具筆之史冊者則用時王正月月數伊訓之元祀十

有二月蔡氏以為殷正月者果何月乎曰建子月也殷

正固在丑月然則嗣王祇見及太甲篇之嗣王奉歸舉不在正月乎曰後世嗣王復考之嗣命固有常儀何待正月而放桐之事又人臣大變周公之聖猶被流言阿衡之心為何如哉朝而自怨夕當復辟尤不須於正月也況正月但書十二以虞書上日正月朔旦及秦漢而下例之殷不其獨無正乎曰秦以亥正猶稱十月不亦同乎曰秦正之謬安足取法蓋秦於寅月書正歲首十月其制又異不若殷之全無正也曰或者謂用夏正故

卜偃老人之言如此則又何說也曰是又不然老人之

言在晉文伯後容或有之卜偃對君之言迺獻公之世

是時篡國日淺二軍始備

天王賜一軍自立一軍

晉文未興齊桓

尚在雖嘗滅耿滅霍小小得志方朝周納貢之不暇

獻公

滅虞歸其職貢于王

亦何故毀冠裂冕更姓改物而用夏正哉然

則愚之所見為有據而春王正月之一辭今古諸儒不

敢輕議者固著明矣

元文類卷四十四